

albanesi, che *continue* li corano a le porte, e à 'uto do fiate sovention di formenti. Mandà letere dil capetanio.

Di sier Domenego Dolfin, capetanio dil colfo, a presso la Vajusa, a di 27, nè è di pi fresche. À ricevuto nostre letere, lo laudamo etc. Ringratia; eri fè forbir le galie sotil, e fornir di aqua; fa le guardie vigilantissime; quelli di la terra lavorano a la marina con zente assai, aspectano Camalli, qual, si non verà, quel lavor li zoverà pocho. *Item*, le nostre galie treteno eri alcuni colpi, e nimici fuzivano per uno pocho, poi tornavano al lavor; non si pol vederarli. À ricevuto per il patrom dil gripo le munition, à partite per le galie, et à 'uto sachi 72 di biscoto etc.

312 *Di Ortranto, di sier Aloixe Contarini, governador, di 4.* Come era zonto il gripo li con letere dil zeneral, à ditto esser stà retenuto al Fanù da uno patron di fusta da Malta, e hali tolto 6 homeni; *unde* esso governador à comandato al soracomito tragurin, vadi li a prenderla.

Da Monopoli, di sier Giacomo Badoer, governador, di 4. Si duol di la perdeda di Modom; quella terra è mal conditionata, non ha forteza, le fosse non compide, è a la porta di San Francesco, loco molto debile. Et il populo è ben marchesco, *tamen* sono villi e timidi. Con ducati 3000 si faria una forteza. *Item*, à 84 provisionati soli, sotto li caporali di Bianchon corso, voria esser il contestabele.

Da Molla, di sier Hironimo Pizamano, governador, di 27 avosto. Di certa bàrcha, va con letere dil re al sanzacho di la Valona, qual partì di Bari con homeni 8, è ita versso Ragusi; dimanda licentia di retenerla, e tuorli le letere. *Item*, come serà fornito il muro versso il castello presto, e quel castelan sta pur li al solito.

Da Trani, di sier Piero di Prioli, governador, di 6. Come mandava le letere dil capetanio; *etiam* si have a li provedadori di le biave, di sier Antonio da cha' da Pexaro in materia di biave, comprade per conto di la Signoria.

Da Rimano, dil secretario, di XI. El signor era in leto con la febre, e li era disceso uno cataro, molto lo molestava. *Ait*, li par andar al macello; sente la ruina di ogni canto; il fiol è con la febre. *Item*, ozi è passato di fuora via con cavali 9 el prefeto, va sul bolognese dal cardinal Vincula, so fradelo.

Da Sibinico, di sier Vetur Bragadin, conte e capetanio, di 25 avosto. Come a di 21 li stratioti dil vayvoda Xarco, con el vice ban e Cosule e uno conte Martim Budesich, cavali 300 in tuto, femo

coraria in teritorio dil turco, nel destreto de Cheregovina, in loco fra certi monti chiamati Rachitino, e à fato grandissima preda de animali menuti zercha 4000, animali bovini zercha 900, cavali e cavale zercha 120, presoni 50 tra femine e maschij, come li à ditto uno de li ditti stratioti dil conte Xarco, zonto li quella matina.

Di Capo d' Istria, di sier Piero Querini, podestà et capetanio, di 7. Come per letere di Damian di Tarsia à inteso, per uno nontio dil conte Zuane, andava con patente a tutti li rectori nostri, li avisava che Miset, bassà di la Bossina, era arivato in Bossina, e in termine di tre zorni era per levarse con 20 milia turchi per corer, et che per la via à sentito certi colpi, dubita siano mossi.

Da Zara, di sier Francesco Venier, conte, e sier Giacomo da Molin, doctor, capetanio, di primo et di do. In la prima, quelli stratioti non poleno durar, voleno danari etc.; in la segonda, di certi avisi, chome Schender bassà non andarà in Friul, ma dà fama, per venir poi a' danni di quel territorio; perhò aricorda si provedi di mandarli danari e mōnition.

Et consultato in colegio di mandarli con la galia sotil, soracomito sier Sabastiam Marzello, alcune munition, et ducati 200 a quelli rectori da spender a li bisogni; et commesso al ditto soracomito vadi li a veder etc. Poi si partì con comission di tochar Cataro, sopra la qual se li mandò a quel rector certi danari; e domino Zorzi Bochali, capo di stratioti 25, è li, con letera perhò di star pocho, *ut patet*.

155 *Scurtinio di podestà a Cremona.*

312

Sier Marco Zorzi, fo capetanio a Bergamo, <i>quondam</i> sier Bertuzi	38.114
Sier Lunardo Grimani, el savio a terra ferma, <i>quondam</i> sier Piero	20.132
Sier Zuam Mocenigo, fo governador, <i>quondam</i> sier Piero	17.137
Sier Bortolo Vituri, fo consier, <i>quondam</i> sier Mathio, procurator	31.125
Sier Zuam Morexini, el consier, <i>quondam</i> sier Lucha	57. 97
Sier Marco Sanudo, fo avogador di comun, <i>quondam</i> sier Francesco	49.105
Sier Piero Malipiero, fo podestà e capetanio a Trevixo, <i>quondam</i> sier Stefano, procurator	31.122
Sier Piero Contarini, el consier, <i>quondam</i> sier Giacomo	49. 98